

Gwarant i weithredu Sut mae gofyn am warant i weithredu?

Beth ddylwn i ei wneud?

Darllenwch y daflen **'EX321 - Rwyf wedi cael dyfarniad ond dydi'r diffynnydd ddim wedi talu - Beth alla i ei wneud?'**, sydd ar gael o swyddfa unrhyw lys sirol neu o'n gwefan yn www.hmcourts-service.gov.uk. Bydd hynny yn eich helpu i benderfynu ai gofyn am warant yw'r peth gorau i chi ei wneud.

Ni fydd gwarant i weithredu yn eich helpu oni bai fod gan y diffynnydd:

- ddigon o nwyddau yn y cyfeiriad a roddwyd gennych y gellid eu gwerthu mewn arwerthiant i godi arian i chi; neu
- yr arian yr ydych yn ei hawlio ar y warant i gyd (i atal gorfod gwerthu nwyddau).

Cyn y gall y llys godi gwarant, mae'n rhaid i'r diffynnydd:

- fod wedi methu talu'r swm y gorchmynnwyd iddo ef neu hi ei dalu; neu
- fod wedi peidio â thalu o leiaf un o'i daliadau/ thaliadau.

Mae hyn yn cael ei alw'n fod 'mewn ôl-ddyled'.

Am faint fedra i godi gwarant?

Gallwch ofyn i feili'r llys sirol geisio adennill unrhyw swm hyd at £5,000. (Nid yw hyn yn berthnasol os ydych yn gorfodi cytundeb wedi ei reoli gan Ddeddf Credyd Defnyddwyr 1974. Dim ond yn y llysoedd sirol y gellir gorfodi'r cytundebau hyn.) Allwch chi ddim gofyn i'r llys sirol godi gwarant am fwy na hyn, ond gallwch drosglwyddo eich dyfarniad i'r Uchel Lys. Wedyn gallwch ofyn i Swyddog Gorfodi orfodi'r dyfarniad.

Os ydy'r swm sy'n ddyledus i chi yn £600 neu lai, fedrwch chi ddim gofyn i'r Swyddog Gorfodi geisio cael yr arian yn ôl i chi.

Ond os ydy'r swm sy'n ddyledus i chi rhwng £600 a £5,000 (oni bai eich bod yn gorfodi cytundeb wedi ei reoli gan y Ddeddf Credyd Defnyddwyr) mae gennych ddewis naill ai i godi gwarant mewn llys sirol neu yn yr Uchel Lys. Fodd bynnag, all staff y llys ddim dweud wrthyfych pa un o'r ddau ddewis sydd fwyaf tebygol o gael yr arian i chi. Chi sy'n gorfod gwneud y penderfyniad hwnnw. Mae'n bosib y gallwch gael cyngor am ddim o ganolfan gyfraith.

Gall Canolfan Cyngor ar Bopeth neu ganolfan cyngori defnyddwyr hefyd eich helpu i benderfynu.

Cofiwch, ni all y beili na'r Swyddog Gorfodi weithredu os nad oes gan y diffynnydd nwyddau i'w gwerthu.

Os penderfynwch godi gwarant yn yr Uchel Lys, bydd angen 'tystysgrif dyfarniad' arnoch. Mae hon yn cynnwys manylion eich achos ac mae'n nodi faint sy'n ddyledus i chi. Er mwyn gwneud cais amdani bydd angen ffurflen N293A 'tystysgrif dyfarniad gyfun er mwyn gorfodi'r dyfarniad drwy writ o fi fa' (fi fa yw'r enw a roddir ar warant yn yr Uchel Lys) arnoch chi. Gallwch gael ffurflen N293A o swyddfa unrhyw lys sirol, neu o'r wefan www.hmcourts-service.gov.uk. Ar ôl i chi gael ffurflen N293A, rhaid i chi lenwi rhan I, a'i hanfon at y llys lle gwnaethpwyd y dyfarniad. Os na fyddwch yn ei llenwi'n llawn, efallai bydd yn rhaid i'r llys ei dychwelyd atoch. Rhaid i chi nodi:

- dyddiad y dyfarniad a'r swm y gwnaethpwyd y gorchymyn ar ei gyfer, gan gynnwys unrhyw gostau ychwanegol a ganiatawyd gan y llys ers y dyfarniad; a
- chyfanswm unrhyw log cronedig ar y dyfarniad ac, os yn briodol, y gyfradd ddyddiol.

Darllenwch y nodiadau ar y naill ochr a'r llall i'r ffurflen.

Mae trefn yr Uchel Lys yn wahanol i'r llysoedd sirol ac yn gallu bod yn gymhleth ac yn fwy costus. Mae'n bosib y byddwch eisiau cael cyngor gan dwrnai, canolfan gyfraith neu Ganolfan Cyngor ar Bopeth cyn dechrau'r broses hon. Mae rhai llysoedd sirol hefyd yn gofrestrfeydd dosbarth i'r Uchel Lys. Gall y staff yno neu yn yr Uchel Lys yn Llundain ddweud rhagor wrthyhych am Orfodaeth Uchel Lys.

Cyn i chi benderfynu bwrw ymlaen, mae angen i chi ystyried a ydych chi'n debygol o gael yr arian sy'n ddyledus i chi a ffi'r llys gan y diffynnydd. Cofiwch na all unrhyw lys warantu y cewch eich arian yn ôl.

Beth fydd ei angen arnaf i godi gwarant yn y llys sirol?

Os byddwch eisiau codi gwarant yn y llys sirol, bydd angen Ffurflen N323 arnoch (cais i godi gwarant i weithredu). Gallwch gael y ffurflen hon am ddim o swyddfa unrhyw lys sirol, neu o'n gwefan yn www.hmcourts-service.gov.uk. Cewch wybodaeth am sut i lenwi'r ffurflen hon ar dudalennau 12-14.

Os oeddech chi wedi cychwyn eich hawliad drwy ddefnyddio Money Claim On-line gallwch gyflwyno cais am warant i weithredu ar-lein. Ewch i www.moneyclaim.gov.uk i gael rhagor o wybodaeth.

Faint fydd hyn yn ei gostio?

Mae'r ffi y bydd yn rhaid i chi ei thalu yn dibynnu ar y swm yr ydych eisiau ei gael gan y diffynnydd. Gall hynny fod:

- y swm sy'n ddyledus i chi i gyd; neu
- ran o'r swm sy'n ddyledus i chi.

Y swm lleiaf y gallwch ofyn i'r beili ei gasglu yw:

- un rhandaliad misol;
- pedwar rhandaliad wythnosol; neu
- £50;

pa un bynnag yw'r swm uchaf.

Bydd y staff mewn unrhyw lys sirol yn gallu dweud wrthyhych faint fydd yn rhaid i chi ei dalu. Mae rhagor o wybodaeth ar gael gan staff y llys neu o'r daflen Ffioedd y Llys Sirol, sydd ar gael o swyddfa unrhyw lys sirol, neu o'n gwefan yn www.hmcourts-service.gov.uk. Bydd y llys yn ychwanegu'r ffi at y swm sydd ar y diffynnydd i chi yn barod. **Ond all y llys ddim talu'r ffi yn ôl os na fydd y warant yn llwyddo.**

Cofiwch, os na allwch chi fforddio'r ffi, efallai na fydd yn rhaid i chi dalu'r ffi lawn. Mae rhagor o wybodaeth ar gael gan staff y llys, neu yn y daflen o'r enw 'Ffioedd Llys - oes rhaid i chi eu talu', sydd ar gael o swyddfa unrhyw lys sirol, neu o'n gwefan yn www.hmcourts-service.gov.uk.

Sut alla i dalu'r ffi?

Gallwch dalu'r ffi mewn arian, drwy archeb bost neu siec. Gwnewch y siec yn daladwy i GLIEM. Er mwyn eich diogelwch eich hun, peidiwch ag anfon arian drwy'r post.

Os ydych chi'n defnyddio Money Claim On-line i gychwyn eich cais am warant i weithredu, gofynnir i chi dalu'r ffi gyda'ch cerdyn credyd neu ddebyd.

Cofiwch mai dim ond ar-lein y gellir derbyn cardiau credyd a debyd. Os ydych chi eisiau talu mewn swyddfa llys sirol, **ni** dderbynnir cardiau credyd na debyd.

Beth ddylwn i ei wneud â'r ffurflen?

Ewch â'r ffurflen wedi ei llenwi neu anfonwch hi ynghyd â'r ffi i'r llys lle cafodd y dyfarniad ei gofnodi (ei wneud). Os ydy'r hawliad wedi cael ei drosglwyddo ers y dyfarniad, dylech fynd â hi neu ei hanfon i'r llys hwnnw. Bydd y llys yn codi'r warant o fewn pump i 10 diwrnod gwaith ar ôl derbyn y ffurflen a'r ffi.

Os byddwch eisiau cadarnhad bod y warant wedi ei chodi, a gwybod rhif y warant, dylech hefyd anfon amlen barod gyda stamp at y llys.

Os bydd y diffynnydd yn anfon unrhyw daliadau atoch ar ôl i chi anfon y ffurflen i'r llys, mae'n rhaid i chi ddweud wrth y llys ar unwaith.

Beth mae'r llys yn ei wneud?

Os nad yw'r diffynnydd yn byw o fewn ardal y llys, bydd y llys yn anfon y warant i'w lys/llys lleol ef neu hi.

Bydd y beili fel rheol yn anfon llythyr at y diffynnydd yn dweud bod gwarant wedi ei chodi a bod yn rhaid iddo/iddi dalu o fewn saith niwrnod.

Os bydd y diffynnydd yn talu, bydd y llys yn anfon yr arian atoch. Gallai hyn gymryd hyd at 15 niwrnod os ydy'r diffynnydd wedi talu drwy siec. (Mae hyn yn angenrheidiol er mwyn gwneud yn siwr bod y siec yn cael ei chlirio.)

Os nad yw'r diffynnydd yn talu o fewn saith niwrnod, bydd y beili yn galw yn y cyfeiriad a roddwyd gennych. Bydd y beili'n mynd i gartref y diffynnydd o fewn 15 niwrnod gwaith o ddyddiad codi'r warant. Bydd y beili'n ceisio canfod nwyddau y gellid eu gwerthu mewn arwerthiant neu gasglu taliad i osgoi gwerthu nwyddau.

Os rhoddwch fwy nag un cyfeiriad, bydd y beili'n ymweld â phob cyfeiriad yn ei dro.

Os oes gan y diffynnydd nwyddau y gellir eu gwerthu, bydd y beili'n tynnu costau cymryd, storio a gwerthu'r nwyddau o'r swm a godant. Bydd y llys yn anfon y gweddill atoch ar ôl gwneud hyn.

Os na fydd y swm hwn yn ad-dalu'r swm sy'n ddyledus i chi, bydd y beili'n ymweld â'r diffynnydd i weld a oes unrhyw nwyddau eraill y gellid eu gwerthu. Os nad oes, ni fydd y beili'n gallu gweithredu ymhellach ar y warant.

A gaiff y beili dorri i mewn i eiddo'r diffynnydd?

Ni all beiliaid fynd i mewn i dŷ'r diffynnydd oni bai eu bod yn cael eu gadael i mewn gan y person sydd yno. Os nad oes neb yno, gall y beili fynd i mewn os oes drws wedi ei adael heb ei gloi neu drwy ffenestr sydd eisoes ar agor. Mae'n bosib y gall beiliaid dorri i mewn i adeiladau busnes os nad oes lleoedd byw yn gysylltiedig â nhw a bod y beiliaid yn credu bod nwyddau'r diffynnydd y tu mewn. Gallant fynd i mewn hefyd os ydy'r beili wedi cael caniatâd i fynd i mewn ryw dro ynghynt a'i fod yn mynd yn ôl i dŷ'r diffynnydd i gasglu nwyddau i'w gwerthu.

Pa nwyddau fedrith y beili eu cymryd?

Fedrith y beili ddim cymryd nwyddau oni bai eu bod yn perthyn i'r diffynnydd neu ei fod yn berchen arnynt ar y cyd. Er enghraifft, fedrith y beili ddim cymryd nwyddau sy'n perthyn i bartner y diffynnydd. (Partner yw rhywun sy'n byw gyda'r diffynnydd fel pe baent yn briod.)

Mae'n rhaid i unrhyw nwyddau y mae'r beili yn eu cymryd fod yn debygol o godi arian mewn arwerthiant. Fydd beiliaid ddim yn cymryd nwyddau os byddant yn credu na fyddant yn codi digon i dalu rhywfaint tuag at y warant ar ôl talu costau eu cymryd a'u gwerthu mewn arwerthiant.

All beiliaid ddim cymryd:

- eitemau y mae'r diffynnydd eu hangen ar gyfer ei waith neu ei fusnes, fel offer crefftwr neu lyfrau;
- eitemau sylfaenol tŷ'r y mae'r diffynnydd a'i deulu eu hangen fel dillad a dillad gwely;
- eitemau sydd wedi eu prydlesu, eu rhentu neu sydd ar gytundebau hurbwrcas; neu
- nwyddau sydd eisoes wedi eu meddiannu gan feiliaid yn gweithredu dan warant arall.

Cofiwch, fydd y beili ddim fel rheol yn cymryd eitemau fel dodrefn ail-law neu eitemau trydanol os nad ydynt yn debygol o godi fawr o arian mewn arwerthiant.

All beiliaid ddim cymryd y canlynol chwaith:

- ceir sy'n cael eu hurbrynu; neu
- gyfarpar nad yw'n perthyn i fusnes.

(Er enghraifft, gall dodrefn swyddfa, peiriannau a moduron fod wedi eu prydlesu.)

Mae'n bosib na fydd dim yn perthyn i gwmni yn ei swyddfa gofrestredig. Os gallwch, rhowch gyfeiriad lle mae'r cwmni yn gweithredu ei fusnes mewn gwirionedd.

Fedrith y diffynnydd wneud unrhyw beth i atal y warant?

Medrith, gall y diffynnydd dalu ffi a gofyn i'r warant gael ei gohirio (stopio).

Bydd y llys yn anfon copi o gais y diffynnydd i ohirio'r warant i chi a Ffurflen N246A (eich ateb i gais y diffynnydd i ohirio'r warant).

Mae Ffurflen N246A yn dweud wrthyhych beth i'w wneud os:

- ydych yn cytuno i'r warant gael ei gohirio ac yn derbyn cynnig y diffynnydd i dalu;
- ydych yn cytuno i'r gohiriad ond eich bod yn credu y gallai'r diffynnydd dalu mwy nag y mae ef neu hi wedi ei gynnig; neu
- nad ydych yn cytuno i'r warant gael ei gohirio.

Os ydych yn cytuno i ohirio ond yn anghytuno â chynnig y diffynnydd, bydd swyddog o'r llys yn edrych ar y wybodaeth a roddwyd ar gais y diffynnydd ac yn penderfynu faint all y diffynnydd fforddio ei dalu. Bydd y llys yn anfon gorchymyn i'r diffynnydd yn dweud wrtho/wrthi faint i'w dalu a phryd. Bydd copi yn cael ei anfon atoch.

Os nad ydych yn cytuno i ohirio'r warant, bydd apwyntiad yn cael ei drefnu a byddwch chi a'r diffynnydd yn cael gwybod pryd i ddod i'r llys. Gallwch ysgrifennu at y llys yn dweud pam eich bod yn gwrthwynebu. Ond, os na fyddwch yn mynd i'r apwyntiad, mae'n bosib y bydd y barnwr rhanbarth yn gwneud gorchymyn beth bynnag.

Oes raid i mi dderbyn penderfyniad swyddog y llys?

Nac oes. Gallwch ofyn i farnwr rhanbarth benderfynu beth fyddai'n raddfa deg i'r diffynnydd ei thalu.

I wneud hynny, bydd angen i chi ysgrifennu at y llys yn dweud pam eich bod yn gwrthwynebu penderfyniad swyddog y llys gan nodi eich rhesymau.

Mae'n rhaid i chi anfon y ffurflen neu eich llythyr at y llys **o fewn 16 diwrnod** o ddyddiad y marc post ar yr amlen y daeth y gorchymyn ynddi. Bydd apwyntiad yn cael ei drefnu a byddwch chi a'r diffynnydd yn cael gwybod pryd i ddod i'r llys. Ni chodir unrhyw ffi am yr apwyntiad hwn.

Os nad ewch chi i'r apwyntiad hwn, gall y barnwr rhanbarth wneud gorchymyn beth bynnag.

Os caiff y warant ei gohirio ond nad ydy'r diffynnydd yn talu fel y dywedodd ef neu hi (neu yn ôl y gorchymyn), gallwch ddefnyddio Ffurflen N445 (cais am ail-godi gwarant) i ofyn i'r llys godi'r warant eto. Mae hyn yn cael ei alw'n 'ail-godi'r warant'. Gallwch gael Ffurflen N445 am ddim o swyddfa unrhyw lys sirol. Nid oes ffi am ail-godi gwarant sydd wedi ei gohirio.

Beth os nad yw'r beili'n casglu unrhyw arian nac yn cymryd nwyddau?

Bydd y llys yn dweud wrthyfch pam na chasglodd y beili unrhyw arian. Os nad ydych wedi clywed dim fis ar ôl i chi godi'r warant, dylech gysylltu â'r llys.

Mae gwarant yn aflwyddiannus fel rheol oherwydd:

- nad yw'r diffynnydd yn y cyfeiriad a roddwyd gennych; neu
- nad yw nwyddau'r diffynnydd yn werth digon i dalu unrhyw beth tuag at y swm sy'n ddyledus i chi a chostau eu cymryd a'u gwerthu mewn arwerthiant.

Os ydych yn siwr bod y diffynnydd yn byw yn y cyfeiriad a roddwyd gennych neu eich bod wedi dod o hyd i gyfeiriad arall, gallwch ddefnyddio Ffurflen N445 i ofyn i'r llys ail-godi'r warant. Ond bydd yn rhaid i chi dalu ffi i ail-godi dan yr amgylchiadau hyn.

Os ydy'r warant yn cael ei hanfon i'r un cyfeiriad, dylech roi disgrifiad o'r diffynnydd os medrwch. Mae'n rhaid i chi hefyd roi'r rheswm pam eich bod yn credu bod y diffynnydd yn dal i fod yno.

Os ydych yn credu bod y diffynnydd yn berchen ar rywbeth a allai fod yn werth ei werthu, gallwch ddefnyddio Ffurflen N445 i ofyn i'r llys ail-godi'r warant. Rhwng fanylion yr eitem neu'r eitemau dan sylw. Bydd yn rhaid i chi dalu ffi am hyn.

Cofiwch, fedrith y beili ddim cymryd nwyddau nad ydyn nhw'n perthyn i'r diffynnydd. Cofiwch hefyd mai chi sy'n gyfrifol am gyflwyno gwybodaeth newydd. Fedrith y llys ddim olrhain y diffynnydd ar eich rhan.

Am faint mae'r warant yn para?

Mae'r warant yn para am **flwyddyn**.

Os nad ydy'r warant wedi ei thalu neu os nad ydy'r beili wedi gwneud adroddiad terfynol o fewn yr amser hwnnw, nid yw bellach yn ddilys. Gallwch ofyn i'r llys i 'ymestyn cyfnod y warant'. Bydd yn rhaid i chi dalu ffi am ofyn i'r llys wneud hynny. Dylech geisio gwneud hynny cyn i'r flwyddyn ddod i ben. Gallwch wneud hynny hefyd ar ôl i'r flwyddyn basio, ond bydd yn rhaid i chi roi rhesymau pam na wnaethoch chi hynny ynghynt.

Os nad ydy'r llys yn cytuno, a'ch bod chi'n dal i fod eisiau defnyddio'r dull hwn o orfodi, bydd yn rhaid i chi ofyn am warant newydd. Bydd yn rhaid i chi dalu ffi arall.

Gaf i siarad â'r llys ynglŷn â'm gwarant?

Cewch, gwnewch yn siwr bod enw a chyfeiriad y diffynnydd gennych cyn i chi ffonio. Os ydy'r warant wedi cael ei hanfon i lys lleol y diffynnydd, cysylltwch â'r staff yn y swyddfa honno. Gall y llys a gododd y warant roi enw a rhif ffôn llys lleol y diffynnydd i chi os nad yw'r wybodaeth gennych yn barod.

Cyn cysylltu â'r llys, dylech gael y manylion canlynol wrth law:

- enw a chyfeiriad y diffynnydd;
- rhif y warant (os ydych yn ei wybod); a
- rhif yr hawliad.

Cofiwch, dim ond syniad cyffredinol o beth sy'n debygol o ddigwydd a gewch chi yn y daflen hon. Nid yw'n egluro popeth ynglŷn â rheolau a threfniadau'r llys. Efallai y gallwch gael cyngor cyfreithiol am ddim o ganolfan gyfraith. Mae'n bosib y gall Canolfan Cyngor ar Bopeth neu ganolfan cynghori defnyddwyr eich helpu hefyd.

Llenwi'r ffurflen gais am warant

Defnyddiwch inc du a LLYTHRENNAU BRAS

Rhowch eich enw llawn a'ch cyfeiriad

Rhaid i chi nodi rhif yr hawliad er mwyn i'r llys allu dod o hyd i'ch ffeil. Ni fydd y llys yn gallu delio â'ch cais hebddo.

Rhowch y cyfeiriad yr ydych chi eisiau i'r beili ymweld ag ef. Nid oes yn rhaid i hwn fod yr un cyfeiriad ag a roddwyd gennych ar y ffurflen hawlio. Ceisiwch roi cymaint o wybodaeth â phosibl.

| Cais am Warant i Weithredu <small>i'w llenwi a'i lofnodi gan yr hawlydd neu ei dwnai a'i anfon i'r llys ynghyd â'r ffi briodol</small> | Request for Warrant of Execution <small>to be completed and signed by the claimant or his solicitor and sent to the court with the appropriate fee</small> |
|--|--|
| Yn Llys Sirol BARCHESTER | In the County Court |
| Rhif yr Hawliad AB212345 | Claim Number |
| <i>ar gyfer y llys yn unig</i> | <i>for court use only</i> |
| Rhif y Warant Dyddiad codi: Gofynnwyd am warant am o'r gloch Côd/enw llys estron: | Warrant no. Issue date: Warrant applied for at o'clock Foreign court code/name: |
| 1 Enw a chyfeiriad yr hawlydd PETER REED 52 MELCHESTER ROAD BARCHESTER BC2 4PW | 1 Claimant's name and address |
| 2 Enw a chyfeiriad ar gyfer cyflwyno a thalu (os yn wahanol i'r uchod) Cyf./Rhif Ffôn | 2. Name and address for service and payment (if different from above) Ref/Tel No. |
| 3 Enw a chyfeiriad y diffynnydd MRS PENNY STEVENS 61 CASTERBRIDGE AVENUE BARCHESTER BC1 5QY | 3. Defendant's name and address |

N323 Cais am warant i weithredu (4.99)
Argraffwyd ar ran Y Gwasanaeth Llys

N323 Request for warrant of execution (4.99)
Produced on behalf of The Court Service

Rhowch gyfanswm yr arian sy'n dal i fod yn ddyledus i chi, gan gynnwys y ffioedd a dalwyd ar gyfer y ffurflen hawlio ac unrhyw fath arall o orfodaeth.

Peidiwch â chynnwys y ffi ar gyfer y cais hwn.

Rhaid i chi lofnodi'r rhan hon o'r ffurflen er mwyn dweud nad yw'r diffynnydd wedi talu fel y dywedwyd wrtho neu wrthi am wneud.

Gallwch ofyn i'r beili gasglu:

- y cyfanswm sy'n ddyledus; neu
- ran o'r swm sy'n ddyledus;
- un rhandal misol;
- pedwar rhandal wythnosol; neu
- £50

pa un bynnag yw'r swm uchaf.

Ychwanegwch y ffi ar gyfer y warant at swm y warant (y ffigur yn B)

Ysgrifennwch unrhyw beth rydych yn ei wybod am y diffynnydd a allai helpu'r beili. Er enghraifft, manylion unrhyw nwyddau y gwyddoch chi mai'r diffynnydd sydd berchen arnynt, neu gyfeiriad busnes gwahanol.

Os ydych chi'n meddwl y gallai fod yn anodd i'r beili weithredu'r warant, dylech nodi hynny yma a nodi pam. Gallai fod yn ddefnyddiol i'r beili petaech yn gallu disgrifio'r diffynnydd neu roi'r amseroedd yr ydych yn credu y bydd ef neu hi gartref.

| | | |
|---|--|--|
| <p>Tystiaf fod y cyfan neu ran o unrhyw randaliadau sy'n ddyledus dan y dyfarniad neu'r gorchymyn heb ei dalu a bod y gweddill sy'n ddyledus bellach fel a ddangosir</p> <p>Llofnodwyd <i>Peter Reed</i> Hawlydd (Twrnai'r hawlydd)</p> <p>Dyddiedig 7^{fed} RHAGFYR 2002</p> <p>4. Manylion y warant</p> <p>(A) Gweddill sy'n ddyledus ar ddyddiad y cais hwn <input type="text" value="256.61"/></p> <p>(B) Y swm y codir gwarant amdano <input type="text" value="256.61"/></p> <p>Ffi codi <input type="text" value="45.00"/></p> <p>Costau twrnai <input type="text"/></p> <p>Ffi'r Gofrestrfa Tir <input type="text"/></p> <p>CYFANSWM <input type="text" value="301.61"/></p> <p>Os yw swm y warant yn (B) yn llai na'r gweddill sy'n ddyledus yn (A), y swm a fydd yn ddyledus wedi i'r warant gael ei thalu fydd <input type="text"/></p> <p>PWYSIG Rhaid i chi roi gwybod i'r llys ar unwaith am unrhyw daliadau a dderbynioc ar ôl i chi anfon y cais hwn i'r llys</p> <p>Dylech hysbysu rhif ffôn fel y gall y beili gael gair â chi os bydd angen:</p> <p>Rhif ffôn yn ystod y dydd: Rhif ffôn gyda'r nos (os yn bosibl): Enw cyswllt (lle y bo'n briodol): Rhif ffôn y diffynnydd (os yn hysbys): <i>Os oes gennych unrhyw wybodaeth arall a allai fod o gymorth i'r beili, neu os oes gennych le i gredu y gallai'r beili gael trafferthion, dylech nodi hynny isod.</i></p> <p>MAE MRS STEVENS ADREF BOB PRYNHAWN GWENER.MAE HI'N BERCHEN FORD ESCORT GLAS</p> | | <p>I certify that the whole or part of any instalments due under the judgment or order have not been paid and the balance now due is as shown</p> <p>Signed Claimant (Claimant's solicitor)</p> <p>Dated</p> <p>4. Warrant details</p> <p>(A) Balance due at date of this request <input type="text"/></p> <p>(B) Amount for which warrant to issue <input type="text"/></p> <p>Issue fee <input type="text"/></p> <p>Solicitor's costs <input type="text"/></p> <p>Land Registry fee <input type="text"/></p> <p>TOTAL <input type="text"/></p> <p>If the amount of the warrant at (B) is less than the balance at (A), the sum due after the warrant is paid will be <input type="text"/></p> <p>IMPORTANT You must inform the court immediately of any payments you receive after you have sent this request to the court</p> <p>You should provide a contact number so that the bailiff can speak to you if he/she needs to:</p> <p>Daytime phone number: Evening phone number (if possible): Contact name (where appropriate): Defendant's phone number (if known): <i>If you have any other information which may help the bailiff or if you have reason to believe that the bailiff may encounter any difficulties you should write it below:</i></p> |
|---|--|--|